

 <small>BIBLIOTHECA UNIV. JAGELL. CRACOVENSIS</small>	<small>kat. komp.</small> <b>585107</b>
	<b>Mag. St. Dr.</b> <b>I</b>

Biblioteka Jagiellońska



stdr0012831





585107

I

Mag. St. Dr.



# ORATIO

In Synodo Prouinciali  
Petricouienſi,

Præſidente

*Illuſtriſſimo & Reuerendiſſ: Domino,*

D. IOANNE WĘZYK,  
ARCHIEPISCOPO GNESNENSI  
LEGATO NATO,  
AC REGNI POLONIÆ PRIMATE,  
PRIMOQVE PRINCIPE,

Habita

*Ab*

*A. R. D. IOANNE FOXIO, Archidiacono Crac.*

Die 22. Maij. 1628.

CRACOVIAE,

In Officina Andreae Petricouij, S. R. M. Typographi.  
Anno Domini, 1628.



F. 20

20



I N S T E M M A  
I L L V S T R I S S I M I .



I N f u l a , C r u x q ; t u u m S e r p e n t i s S t e m m a c o r o n a t  
T u P a t r i a m p r e c i b u s , c o n s i l i j s q ; i u u a s .

585107 I Mag. St. Dr.

355807

I

1954 D 907



*Illustrissimo & Reuerendissimo Domino,*

**D. IOANNI WEZYK,**

*Dei & Sedis Apostolicæ Gratia,*

**ARCHIEPISCOPO GNESNEN.**

**LEGATO NATO,**

**ac Regni Poloniæ Primate,**

**Primoq; Principi. &c. &c.**

**S***Ermonem, voluntate & iussu Tuo Ill<sup>me</sup>  
& Rn<sup>me</sup> Princeps & Archipresul, in Syno-  
do Prouinciali, à me habitum; non illo qui-  
dem Oratorio nimis exquisito stylo, puro  
tamen & Latino conscriptum, ac ad amussim verbo-  
rum Architecti sapientis, interpositis sacrarum litera-  
rum & Patrum testimonijs, concinnatum: iterum no-  
uâ veste indutum, hoc est, typis excussum, in conspe-  
ctum Tuum mitto; Tum quod formam boni Sacerdo-  
tis & Pastoris, quam ego verbis adumbrare conatus  
sum, vitâ & moribus exprimas: tum ut si quid in eo  
ad adificationem dictum est, ad absentium quoq; utili-  
tatem proferatur: ille verò in lucem emissus, Tui Nomi-  
nis splendore gratior & ornatioꝝ appareat.*



Præfatio.

Porro Deum Opt: Max: supplex rogo, ut qui in Te mirificum ardorem ad sui cultum excitandum propagavit, ille vitam diuturnam & vires integras ad tot & tantos in Ecclesia & Repub: labores perferendos largiatur; quò penè naufraganti Patria, consiliorum Tuorum, quâ polles prudentia, accedente eò summâ, qua in Regno vales auctoritate, opem non dubiam, quamprimum ferre possis. Tu verò Ill<sup>m</sup> Princeps me, eâ qua dudum immeritum capisti benevolentia prosequi, ac Amplissimo patrocinio tueri quasso velis. Viue diu felix, Ecclesia, Patria, ac bonis, quas impensè amas, literis. Crac: die sexta, Mensis Iunij. Anno Domini, 1628.

Illustriss: & Rndiss: Celsitud: Vestra

deuotus obsequiis Sacerdos

IOANNES FOXIUS, Archidiaconus: Crac.



# ORATIO.



Vm Vestrum hunc augustum confessū intueor, ILLVSTR: AC REVER: ARCHIPRÆSVL, REVERENDIS: AN- TISTITES, PATRES ET FRATRES VE- NERANDI, Videre mihi videor Duces populi, Principes militiæ Christi, Ar- chitectos quosdā Spirituales, illis verbis recensitos: Et ipse dedit quosdam quidē Apostolos, quosdam <sup>Ephes: 4.</sup> autem Prophetas, alios Euangelistas: alios autem Pastores & Doctores, ad consummationē Sancto- rum, in opus ministerij, in ædificationem Corpo- ris Christi. Vos sanè estis, qui in Apostolorum lo- ca successistis. Vos item cæteri, adsciti in opus mi- nisterij, in ædificationem Corporis Christi.

At quænam sit ista fabrica Spiritualis; quæ materia, ex qua Christi corpus ædificari, & con- summatio Sanctorum effici debeat: operæ prætium est, vel in primis, cognoscere. Neq; verò ego tan- tum mihi tribuo, vt eam rem vel animo concipe- re, vel verbis exprimere valeam; sed ipsum qui hæc verba protulit, qui se Spiritum Dei habere affirma- uit, ipsum inquam Magistrum, alio loco, & funda- mentum, & materiam ac ordinem ædificiorum, adferentem, audite.

Vt sapiens architectus fundamentum posui: <sup>1. Cor: 3.</sup>



## O R A T I O.

Fundamentum autem, aliud nemo ponere potest præter hoc, quod positum est, quod est CHRISTVS IESVS. Vnusquisq; autem videat, quomodo superædificet. Si quis autem ædificauerit supra fundamentum hoc, aurum, argentum, lapides præciosos; ligna, fænum, stipulam: vniuscuiusque opus manifestũ erit. Et vniuscuiusq; opus quale sit, ignis probabit. Si cuius opus manserit; quod superædificauit, mercedem accipiet: si cuius opus arserit; detrimentum patietur. Doctrinam hanc Apostoli, sublimem à S. Augustino inter illa deputatam, quæ in D. Pauli Epistolis difficilia esse intellectu Princeps Apostolorum censuit; & loco huic celebri, & tempori calamitoso, valdè accomodatam, esse existimo. Cùm enim ignis diu latens callidi hostis exarserit, & carbones inferni in perniciem, Ecclesiæ succensi sint ab eo: summo perè necessarium est, talia à nobis in primis ædificia construui, & in hac prima, quod Deus secundet, NOVI PRIMATIS Synodo, legibus firmari, quæ & irâ Dei placare, & inimici sauiantis impetum possint euadere: in quibus ex hac Apostoli sententiâ in medium adferendis meus sermo versabitur: qui Vestra voluntate susceptus, Vestro, quæso, fauore & beneuolentiâ, in primis autem Dei ope adiutus, ad ipsius gloriam decurret.

Aug: in  
quæst: ad  
Dulce: 9.  
r.

Illud



Illud autem inprimis præfari volo: hac reconditâ doctrinâ, non solum Episcopos, sed etiâ ipsorum ministros Presbyteros, voluisse Doctorem gentiû erudire: quod satis illa verba ostendunt. Vnusquisq; videat, quomodo superædificet: Dei enim adiutores sumus. Ita sanè, idem Apostolus, illas bene viuendi formulas, quas Præsulibus præscripsit, ad Sacerdotes etiam, quibus nulla alia præcepta dedit, referri voluit: quod in toto Orationis meæ cursu, quaeso, memineritis; vt quæ de Antistitum munere dicentur, Sacerdotalis quoq; officij esse censeantur; & quæ Sacerdotum sunt munia, ab illis Antistites non eximantur.

1. Tim: 3.

In duos itaq; ordines, tota series ædificij Ecclesiastici distribuitur: Bonum, enim Ecclesiæ, Ministri eius, quos Apostolus adiutores Dei appellat, bifariam promouent. Alij sanctitate, doctrinâ, & iustitiâ coram Deo; quod ædificium auro, argento, & lapidibus preciosis exprimitur. Alij diuitiarum splendore, & temporalium rerum incrementis coram hominibus; quæ structura prioris comparatione, lignea, fanea, & straminea censetur. De vtrisq; structuris: ac primò de istis magnificis, tum de vilioribus, dicere institui.

Primum locum in hac Spirituali ædificio vendicat sibi aurum. Qui autem sunt illi, qui aurea in Ecclesia Dei fabricant ædificia; Illi certè, qui geminâ charitate, quæ perfectionis vinculum est, in-

col: 1.

flammati,



flammati, ardens quoddam desiderium, seu zelum honoris diuini & salutis hominum in corde gerūt.

Accum multa sint, quæ de Zelo ad regimen animarum vtilissimo dici possunt: mihi quidem vel commendationem eius vel necessitatem attigisse suffecerit. Nullum equidem maius sacrificium, offerri Deo potest, zelo animarum, vti D. asserit Gregorius: Hoc opus non humanum, sed supra naturæ ordinem, ideoq; diuinum, censetur, cooperari Deo in salute animarum. Quid ita? Quia Domini est salus. Qui ergo ad dandam salutem, Dei adiutores sunt, vti certè omnes nos sumus, diuinū planè opus agunt. Quantum enim esset cooperari Deo in molitione cæli & terræ? atqui hoc multò maius est. Audite quid hac de re aureum illud os D. Chrysostomi eloquitur, cū inducit Deum loquentem: Feci ego coelum & terram: eadem conditionis facilitate te dono; vt terram, facias coelum. Accendi ego luminaria; accende tu clariora illis: namq; potes his qui in errore sunt, lumen veritatis accendere. Maius istud beneficium, est, quàm solem intueri. Hominem creare non vales! at iustum gratumq; Deo potes efficere. Ego substantiam feci: tu exorna voluntatem. Vide quàm te diligam, qui maiora tibi perficiendi potestatem tribuam. Ita egregiè Chrysostomus: Verum, num horum aliquid sine hoc sancto animi feruore

Hom: 12.  
in Ezech.

Psal: 17.

Hom: 55.  
ad pop:  
Ant.



mi feruore præstare quis poterit? Minimè gentium. Sicut enim ex terræ metallo, sine ignis calore aurum conflare non potest: ita & multò magis, vt ex terra fiat cælum, vt terreni homines efficiantur cælestes, certè vel in primis ignis iste, seu zelus, efficiet. Accendere autem lumen veræ & viuæ fidei quomodo quis poterit, nisi ipse prius ardeat? Si enim nihil accendit, nisi ignis: ita & tu profectò non accendes, nisi ipse prius hoc sancto igne exarseris. Deniq; auferre sordes peccati, ac animam, veris adornare virtutibus, vt grata & accepta sit Deo, quis sine zelo vel præsumere audeat? Multo labore sudatum est, inquit Propheta, & non exiuit ex ea nimia rubigo eius, neq; per ignem. Quod si tu hoc igne careas: neq; rubiginem peccati abstuleris, neq; animam ad virtutum splendorem expolliueris. An ergo hæc parua cuiq; videtur zeli sacerdotalis commendatio, sine qua diuinum hoc opus salutis rectè geri, ac ne geri quidem potest? Quare vt necessitatem quoq; ipsius attingam, illud vnum, pro multis adferam. Quemadmodum enim ad hanc, qua nihil charius habemus, vitam corporis vel viuendam, vel conferuendam spiritu vitali indigemus, sine quo corpus vitales functiones non exercet: ita sanè his qui præsumt necessarius est spiritus zeli; quem si non habent, deputantur cum mortuis, nec vnquam

non est

B

excitare

Ezech: 24



**Hzbr: 9.** excitare poterunt conscientias hominum ab operibus mortuis ad seruiendum Deo viuenti. Vultisne huius dicti mei veritatem clariùs cognoscere? Profero vobis illum vnum Antistitem, cui nomine Dei dictum est: Scio opera tua, quia nomen habes quod viuas, & mortuus es. **Apo: 3.** Esto vigilans, & confirma cætera, quæ moritura erant, & poenitentiam age. Cur quæso iste licet viuat, mortuus esse dicitur hyia zelo, seu vigilantia Pastorali, quæ salus subditorum est, fuit destitutus.

Quæ autem sunt obsecro ista, quæ vigilans confirmare iubetur moritura? Montem quendam valdè profundum, videtur mihi S. Ioannes his verbis ostendere; ex quo aurum hoc zeli eruitur, qui non alius est, nisi attenta cogitatio peccatorum, mortem animæ adferentium, quibus in toto orbe Deus offenditur. Considerabat benè has offensas ille, qui scisso pallio & tunicâ, genibus flexis, ac manibus expansis, ante templum plorans, tales ad Deum fundebat preces: Deus meus, confundor & erubesco leuare faciem meam ad te, quoniam iniquitates nostræ multiplicatæ sunt super caput nostrum, & delicta nostra creuerunt vsq; ad coelum, à diebus Patrum nostrorum: sed & nos ipsi peccauimus grauiter, vsq; in diem hanc, & in iniquitatibus nostris traditi sumus, in gladium, & rapinam, & confusionem vultus, sicut in die hac.



# ORATIO.

7

An non ita nobiscum geritur? Typum & imaginem miseriæ nostræ præsentis videmus, quam delicta & iniquitates nostræ attulerunt. Nolo ego delicta Ordinis nostri Ecclesiastici, in quibus vti homines delinquant recēdere: ne quem mea nimis offendat oratio. Referat aliqua Dei seruus, is qui se seruum seruorum Dei primus appellauit. Nulla animarum lucra quærimus, ad nostra quotidie studia vacamus, terrena concupiscimus; humanam gloriam intentâ mente captamus, Dei causas relinquimus. Locum sanctitatis accipimus, & terrenis actibus implicamur.

Greg. Homil. 17. in Euang.

Iniquitates verò populi, quibus Spirituales mederi debent, quis numerauerit? Illæ sunt, quarum præcipuas expressit Saluator: De corde exe-  
unt homicidia, adulteria, fornicationes, furta, falsa testimonia, blasphemix; quibus addamus, scelera, quæ in hoc Regno impunè patrantur: scilicet sacrilegia, templorum profanationes, periuria manifesta in iudicijs, vsuras publicas, pauperum oppressiones; subditorum, quæ morti æquiparantur, seruitutes; rapinas, raptus, matrimonij pupillaris nundinationes, & grauissimas, quæ in dies crescunt, hæreses; & sexcenta id genus. Hæc videbunt Antistites & Sacerdotes; & sanandis his exiti-  
alibus animarum morbis, quantum in illis est, non inuigilabunt? Quisq; nostrum sibi dictum existi-

Matt: 15.



met: Esto vigilans, & confirma cætera quæ moritura erant. Audite quibus verbis mellifluus Bernardus ad hanc vigilantiam sese excitabat: Si stillantem in cruce Domini sanguinem collegissem, essetq; repositus penes me in vase vitreo, quod & portari sæpius oporteret, quid animi habiturus essem in discrimine tanto? Et certè ad seruandum, accepi, pro quo mercator non insipiens (ipsa utiq; Sapientia) sanguinem istum dedit: sed & habeo thesaurum istum in vasis fictilibus, & quibus multò plura quàm vitreis imminere pericula videantur. Quid ego? quò me vertam infoelix, si tantum thesaurum, si preciosum istud depositum, quod Christus sanguine suo pretiosius iudicauit, contigerit negligentius custodiri? Hoc itaq; aurum Zeli, seu feruoris Spiritus, ex isto monte eruite, illud commendatum habete, atq; uti summe necessarium, à Deo precibus obtinete.

Argentū.

Psal: 11.

2. Tim. 4.

Alterum à nobis in hoc fundamento superædificari debet argentum, prædicationis verbi Dei ministerium. Eloquia Domini, eloquia casta, argentum igne examinatum: ad quem thesaurum, fidelibus dispensandum, prædicator veritatis, igneis quibusdam & admiratione dignis verbis admonet. Testificor coram Deo, & Christo Iesu, qui iudicaturus est viuos & mortuos, per aduentū ipsius & regnum eius. Obtestatur Antislitem per iudicium Dei, in



Dei, interminatur poenā in illo iudicio, si officium neglexerit. Ostendit prāmium in aduentu regni Dei, si munus impleuerit. Prædica, inquit, verbum, <sup>1. Tim: 4.</sup> non fabulas, neq; genealogias interminatas, quæ <sup>1. Tim: 1. ad Tit: 3.</sup> non sunt ad ædificationem Dei, vti quidam in funeribus perperam faciunt; neq; stultas & inutiles quæstiones: sed Dei verbum narra; quod in lege & in Euangelio continetur. Legatione fungeris <sup>2. Cor: 5.</sup> pro Christo: Ostende literas fidei, & legationis tuæ. Quid enim aliud est Scriptura sacra, vt pulchrè dicit S. Gregorius, nisi Epistola quædam Dei <sup>Lib: 4. Epist: 84.</sup> omnipotentis, quam mittit per legatos ad creaturam suam. Prædica ergo verbum, & voluntatem eius, qui te misit, populo declara.

Et sic quidem Apostolus cum Timotheo indulgentiùs, secum ipse seueriùs agens, ad hoc munus laboriosum implendum, calcaria sibi addebat: Væ mihi, si non Euangelizauero: Si Euangelizauero, gloria mihi non est. Necessitas enim mihi incumbit. Væ autem mihi est, si non Euangelizauero. Illustrat hæc verba Theodoretus. Seruus non se iactat, cū Domini officium facit. Sed si resistit voluntati Domini, poenam meretur. Quam poenam? Damnationem, inquit Hieronymus: Væ mihi, si non Euangelizauero.

Quanto autem studio & feruore, coeleste hoc pabulum Præsules populo ministrarent, S. Dun-



Sur: in  
Vic: SS.  
die 19.  
Maij.

Martyro:  
Rom: die  
18. April.

stani Primatis Angliæ, Archiepiscopi Cantuariens: egregium factum indicat. Cùm enim ille senio confectus, die sollenni, quo Dominus victor in cœlum ascendit, ad coelestem gloriam ab Angelis vocaretur, respondisse fertur: Quò me inuitatis, ô coelestes Spiritus, non possum hodie venire, nisi prius oues à Domino mihi commendatas, (quæ id plurimæ expectant, & quas decipere non est meum,) pane verbi Dei hac die refecero; & quo tramite Christum sequi debeant, ostendero. Nec minori laude dignus S. Galdinus Episcopus Mediolani, qui cùm aliquando non ouibus sed lupis prædicasset: cùm inquam feruentem concionem aduersus hæreticos Catharos expleuisset, spiritum Deo reddidit. O nimis fælices Episcopos! qui ex labore prædicationis verbi Dei, migrarunt ad præmium, ad videndum æternum Dei verbum.

Excusari quidem interdum possunt Antistites ab hoc munere, vel ob graues functiones Senatorias, vel si talentum docendi non habeant: sed certè inexcusabiles sunt, si docendi & pascendi munus personis, vel ob ætatis vel doctrinæ defectum, minus idoneis, quod multorum malorum causa est, committunt.

Quare si hoc argentum probatum inueniatur, siue in alto, siue in humili loco, promite & in usum Ecclesiæ proferte. Si qui in Clero probi, & diuina-



diuinarū ac humanarū rerum scientiā exculi inueniuntur, hi Ecclesiasticis negocijs adhiberi, hi amari; & cū amor opere probetur, & beneficijs debent ornari. Ita sanē in Ecclesia Dei superædificatur argentum.

Tertio loco in hac preciosa structura poni debent lapides preciosi, virtutum splendorem designantes, illi nimirū duodecim, Dei iussu in rationali seu pectore Sacerdotis positi, in quatuor ordines distincti. Quatuor enim ordines gemmarum Sacerdos in pectore gestat, cū quidquid facit, loquitur, adeoq; cogitat, prudentiā circumspectum, iustitiā rectum, fortitudine firmum, temperantiā à malis omnibus fuerit secretum. Quid autem singuli illi duodecim lapides exprimant, ne longior sim, non recensebo: præsertim cū compendio quodam Deus ipse id satis expresserit, iubens in eodem ornamento Sacerdotali illa duo verba scribi: Doctrina & Veritas. De doctrina, quod sit munus Pastorum, iam dictum est. Atqui non minùs ab illis exigitur Veritas, quæ duplici genere, tam verborum, quàm rerum concluditur. Veritas quidem dictorum est, cū verba rebus æquantur; cū falsitas omnis abest. Veritas autem rerum est, cū res seu facta cum verbis concordant: ac ut vno verbo dicam; cū Sacerdos quod monet, ipse facit; cū præit exemplo, & viam Dei in veritate docet; cū

Lapides  
pretiosi.

Exod. 28.

Matt. 23.



cùm non solum gemmis & margaritis ornatus, sed præclaris etiam factis illustratus in publicum prodit.

Miramur, & meritò quidem, tot & tanta scelerata reperiri; paruum profectum verbi Dei videmus. In promptu vel illa præcipua causa est, quod cum Sacerdotum vita mirabiliter pugnat oratio. Habent aliquid zeli, adferunt doctrinam: sed in veritate vitæ, in hoc tertio signo cum illis Magis Pharaonis, pleriq; omnes deficiunt. Quod ergo Deus coniunxit in Sacerdote, Doctrinam & Veritatem, homo non separet, si homines Deo coniungere, uti debet, fatagit. Sit non solum vox eius dulcis, sed & facies decora; hoc autem est, vita, perquam quisq; velut ex facie cognoscitur, virtutibus ceu gemmis ornata. Nam si vita non est commendabilis, & vox erit ingrata. Cuius enim vita despicitur, restat ut eius prædicatio contemnatur.

Ostendi iam ædificia preciosa, à Dei ministris erigenda: quæ ne nobis excidant, meminerimus illa, non solum D. Pauli, sed etiam Dei voluntate in Sacerdotibus requiri. Quid enim illud est, quod Deus lege perpetua Aaroni & filiis eius Sacerdotibus de hostiis immolatis non alias partes in cibum cedere voluit, quam pectusculum & humerum dextrum; & uti D. Chrysostomus & Beda venerabilis observant, etiam *σπαιρον*, id est maxillam

Exod: 8.

Matt: 19.

Cant: 2.

Leu: 7.

Chrysost:

Homil: 12.

in Marc.

Beda in c.

27. Exo.



xillam partē fuisse Sacerdotum. Non sine mysterio id factum. Sacerdoti cedit in cibum pectus, vt habeat zeli feruorem in corde. Pars ipsius maxilla, vt teneat verbum prædicationis in ore. Esca deniq; eius armus dexter, vt sit ei iuge exercitium virtutum in opere. Ex hac sanè triplici materia consumatio Sanctorum & ædificatio Corporis Christi in fundamento veræ fidei efficitur. Zelus enim faciet, vt Antistes, & Sacerdos ædificare velit; Doctrina, vt sciat; virtus, vt possit. Verum de his hæctenus. Transeo iam ad humiles illas casas, quæ comparatione priorum ex lignis, fæno & stipula, contextæ esse censentur; quibus lumen intelligentiæ paucis adferam. Si quis ædificauerit ligna, fænum, stipulam, vniuscuiusq; opus manifestum erit.

Primum autem illud dico. Licet compertum sit, per hæc vilia, & obscura opificia, plerosq; omnes, minores ideoq; venia dignos lapsus, intelligere; quorum sententiæ suus locus relinquatur: At certè non defuerunt aliqui ex Patribus, & viri eruditi, qui hæc aliò retulerunt. Vbi enim Christus fundamentum est, bonorū operū ædificium sequi debet: ad quod peccata etiam parua referri, & in isto fundamento collocari non possunt. Quæ enim Societas luci ad tenebras? Quid ergo hæc sibi volunt? Vsum, incrementa, & accessiones fortunarum expriment. Cùm enim opes & facultates à

C

natura

Aug. in  
Enchirid:  
c. 68.  
D. Thom:  
in Comē:  
1. Cor. 3.  
2. Cor. 6.



natura ostensæ, vel ex sylvarum amplitudine, vel ex pratorum abundantia, vel ex frugum vberitate præcipuè congerantur: qui progressum ecclesiæ accessione & splendore diuitiarum, & opum in primis metiuntur, perinde faciunt, ac si in domum Dei, ligna, fœnum, & stipulam intulissent. Nunquid illos damnat Apostolus? Non equidem, quia & isti ædificant: sed illis qui aurum, & argentum, & gemmas adferunt, multo inferiores esse censet. Sed iam audio illas voces vsitatas. Atqui temporalia sine spiritualibus subsistere non possunt. Ita sanè; Verum quatenus cura temporalium, Ecclesiasticis gerenda sit, diuino apud Ezechielem edocemur oraculo. Sacerdotes, caput suum non radant, neq; comam nutriant, sed tondentes attondeant capita sua. Aperit nucleum mysterij, Doctor Morum. Quia enim cuncti, qui præsunt, habere quidem exteriores sollicitudines debent, nec tamen eis vehementer incumbere: rectè Sacerdotes, & caput prohibentur tradere, & comam nutrire; vt temporales cogitationes nec à se funditus amputent, nec ad crescendum nimis relaxent, sed tondentes attondeant capita sua. Seruentur capilli in capite Sacerdotis vt cutem cooperiant: & refectentur, ne oculos claudant. ac si dictum fuisset: Provideantur necessaria, quæ ad cutem curandam & ornandam pertinent; At ne istæ curæ & cogitationes de super-

Ezech: c.

44.

Greg: par:

2. Past: c.

7.



# ORATIO.

15

de superfluis excrescant, & ab illa preciosa spiritali structura animum & oculos auertant, magnopere est præcauendum.

Vt autem me ex his ligneis, imò aureis etiam, ædificiis, breuiter expediam: liceat mihi de amborum tum probatione, tum mercede (vt manifestationem omittam) duo verba cum Apostolo in medium adferre.

Primum verbum timorem incutit. Vniuscuiusq; opus quale sit, ignis probabit. Non ille quidem tantum, qui post hanc vitam peccatorum labes expiare, creditur; verum, vt Diuus Augustinus, & alij obseruârunt, ignis quidam doloris, cor vrens etiam in hac vita, quo opera ministrorum Dei probantur. Ille sanè ab Ecclesiastico descriptus. Sicut aurum in igne probatur: ita homines receptibiles seu acceptabiles in camino humiliationis. Graue hoc examen, quia ignis examen est; nec vulgaris, sed Diuina probatio, qua Deus examinat opera preciosa, quæ per ignem illæsa transeunt: qua item probat illa fragilia quæ comburi necesse est, ac etiam vnà cum illis cor aduri: vtraq; sanè ædificia per hunc ignem aduersitatis transeunt.

Alterum verbum, partim solatium, partim merorem adfert. Sicutius opus manserit, mercedē accipiet. Magnū his qui perfectionis culmen at-

In Enehi-  
rid: c. 68.  
Greg: lib:  
4. Dial. c.  
39.

Ecclesi: 2.



tingunt est solatium; quorū ædificia magnifica, etiā in præfenti tempore, ab igne illæsa manent: & manent quidem, tum ad opus, tum ad meritum. Vultis, vt exemplis rem totam demonstrem? Nunquid obstinatus ille Pharaon abstulit zelum Moysis, licet illum tot malis afflixisset. Mansit hoc aurum in illo igne, & promeruit vt audiret illud à Deo. Ecce constitui te Deum Pharaonis. Quia habes zelum Dei, qui fortis & zelotes est. Sis ergo Deus Pharaonis.

Numquid idem tyrannus abstulit Aaroni argentum prædicationis: quæ vtique māsit igne aduersitatis examinata, & præmio à Deo illustrata; vt ex interprete ad Prophetiæ dignitatem fuerit euectus, dicente Deo: Et Aaron frater tuus erit Propheta. Et vt propinquiora adferam: An quæso immanis illius tyranni ignis, quem glorioso Martyri S. Laurentio adhibuit, lapides illos preciosos, fortitudinē animi eius & beneficentiā in egenos combussit? Mansit illud opus, quam laudem dat Martyri Ecclesia: Dispersit dedit pauperibus, iustitia eius manet in sæculū sæculi. Mansit & merces. Cornu eius, illud inquam robur animi Leuitici, exaltatum est in cælesti gloria. Et sic quidem manent preciosa ædificia. At de illis vilibus, definitiuam, & mærori permixtam sententiam audiamus. Si cuius opus arserit, detrimentum patietur. Non manent certe



certè istæ structuræ, quoad opus. Adest inopinatus aliquis casus, & sæuus hostilis ignis; & omnia confundit, interdum in cinerem & fauillam conuertit. Magnum toties, quod sine dolore commemorari nequit, detrimentum patimur, quando possessiones, horrea, subditi Ecclesiæ, expilantur: & militum, ante oculos nostros, cedunt furori. Ardent certè ista opera, nec manent. Sed numquid manent ad meritum? Vtiq; si in fundamento Christi ædificabantur, si Ecclesiæ ista acquirebântur. Opus ardet: Ipse autem qui damnum sentit, manebit, fundamenti incorruptione munitus. Saluabitur: sic tamen quasi per ignem. Non periclitabitur quidem omninò de salute: sed dolor iste & cruciatus ex amissione partus sui, instar ignis peccata expiantis illi seruiet. Procul autem hinc illi absunt, qui administrationem magistratûs, messem auream esse censent; qui aliud fundamentum, quàm quod positum est ponentes, vt Sacris verbis vtar, Syon in sanguinibus ædificant, ac sua quærunt, non quæ Iesv Christi. Horum profectò quàm in præcipiti stet res salutis, Sacri de peculio Clericorû lati Canones, qui Spiritu Dei conditi, non falsa, sed vera loquuntur & perfecta, ne ego id referram, satis abundè testantur.

Mich: 3.  
Philip: 2.

Vnusquisq; ergo videat, quomodo superædificet. Vnusquisq; enim mercedem accipiet, secundû  
C 3 proprium



1. Cor: 3. proprium laborem; Dei enim adiutores sumus.  
 in Talia, quaeso, & Vos Patres, illa inquam magna  
 & permanentia opera agite, & in Ecclesia  
 in primis relinquit. Aurum illud zeli obscuratum,  
 Thren: 4. pristino splendori restituite. Argentum verbi Dei  
 neglectum, colorem ipsius optimum mutatum,  
 & nigredine malæ vitæ fuscum, probè expur-  
 gatum, populo reddi facite. Lapidés sanctuarij  
 (proch dolor) in capite omnium platearum di-  
 spersos ad Sanctuarium reuocate. Hæc ut etiam  
 à Clero præstentur, doctrinam incorruptam, &  
 morū emendationem, quæ propria Synodorū tra-  
 ctatio est, legibus sancite: ac quod caput rei est, leges  
 ipsas optimas & saluberrimas executioni mandate.  
 Hæc vos gloriosos, omnibus charos & venerandos,  
 ac lōgo sæculo memorandos reddent. Inuitat vos vi-  
 nà mecum ad hæc gnauiter præstanda diuinus ille  
 Ecclesiasticus, cuius præclara sententia totam  
 hanc meam parenesim complexa esse videtur.

Ecclesi: 14.

Omne opus corruptibile, (quale est ligni, fœ-  
 ni, stipulæ) in fine deficiet; & qui operatur illud, ibit  
 cum illo: & omne opus electum, (auri & argen-  
 ti, gemmarum) in fine iustificabitur: hoc autem  
 est, approbabitur à Deo; & qui operatur illud, ho-  
 norificabitur in illo. Faxit iam Deus, ut pro his  
 structuris excelsis, ac veluti templis magnificis e-  
 rectis,



# ORATIO.

19

rectis, siue etiam pro illis vilioribus in rem Eccle-  
siæ vtiliter constitutis, in illo fine, quo paucitas  
dierum nostrorum finietur breui, honorem  
referamus; & cùm apparuerit Prin-  
ceps Pastorum, percipiamus im-  
marcescibilem gloriæ  
coronam.

Iob 10.  
1. Petr: 5.





21

917A10

for further contents, in the line, on page 11

1890

*[Faint bleed-through from reverse side]*

1871

1893

1871

151210-102



Bibl. Jag.







